

1981

En pia memoria da

9.1.81

## Barla Catrina Andreoli-Peder, Selva/ Tujetsch



En pietad seregurdein nus da nossa cara e zun preziada convischina: Barla Catrina Andreoli, nata Peder, da Selva/Tujetsch. Ella ei naschida en quella ucliva, dadens igl uaul da sontga Brida, ils 14 da schaner 1914, e quei sco sisavel affon da treis buobas e quater buobs dils buns geniturs Gion Antoni e Maria Peder, nata Hendry. La defuncta ei carschida si en quei bi menaschi puril. Cheu deva ei lavur e regeva tema da Diu. Ella frequenta las scolas, da lezzas uras aunc a Selva. Suenter che ses fargliuns eran maridai ora, eis ella restada ensem en cun siu frar ed ils buns geniturs anavos. Lezs ein vegni sin in'aulta vegliadetgna. Il bien ch'ella ha fatg – oravontut pils geniturs – ha quel sisura segir nudau si.

S'avanzada empau els onns, ha la giuvna Barla Catrina tunschiu il maun 1952 per la ligia matrimoniala.

Sin giavisch dils buns geniturs dalla spusa ei il spus secasaus a Selva en casa da sia consorta. Sut lur tetg regeva cumentientscha. Mo denter las rosas semischeidan era spinas. La lètg ei restada senza affons. 1963, suenter mo 10 onns da veta matrimoniala, ha il Segner clama tut surura il carezau consort entras ina daguota dil cor. Quei ei stau ina greva frida per la consorta, denton ella ei sere-messa ella veglia dil Segner. 1977 vegn la buna Barla Catrina surprida d'ina nauscha e perfida malsogna. Da quella eis ella mai serestabilida dilit. Il pitir stendiu e mal dolorus da quella fugan e foran senza cal. Ils fargliuns lain munchentar neginas breigias per saver purtar levgiament. Mo la via dalla crusch secontinuescha e mudregia nossa Barla Catrina entochen la mort che ha liberau ella da Nadal da sias dolurs. Ils 27 da december han ins surdau las restonzas terrestras dalla buna defuncta alla tiara benedida el bi santeri a Sedrun.

Ei seigi aunc allegau in fatg remarca-bel. La preziada e buna defuncta ei la tiarza che ruaussa en santeri in sper l'auter dall'annadá 1914. Ina baseli-giada – sco mo tier las pli grondas fistas – ha accumpaignau la cara defuncta a siu davos viadi terrester, Barla Catrina, Ti has finiu Tiu panzar e pitir e sas spetgar sin la gloriusa levada. Nus condolein a Tes fargliuns ed enconuschents, en tut special a Tiu frar Ignazi. Il Segner consoleschi Vus en Vossa dolur. Ei dat segir in severer. RIP! G.F.